

Ragnhildur H. Sigurðardóttir
Þórólfsvoll
660 Skútustaðarhreppur

Reykjavík, 27. ágúst 2021
UST202108-057/Þ.V.B.
09.07.01

Umsókn um leyfi til framkvæmda - Mývatn og Laxá - borun eftir neysluvatni

Umhverfisstofnun hefur móttækið umsókn Ragnhildar H. Sigurðardóttur, dagsetta 6. ágúst 2021, um leyfi til framkvæmda innan verndarsvæðis Mývatns og Laxár.

Mývatn og Laxá í Suður-Þingeyjarsýslu eru vernduð með lögum nr. 97/2004. Markmið laganna er að varðveita líffræðilega fjölbreytni, jarðmyndanir og landslag svæðisins. Í 17. gr. reglugerðar nr. 665/2012 um verndun Mývatns og Laxár í Suður-Þingeyjarsýslu segir að leita skuli leyfis Umhverfisstofnunar fyrir hverskonar framkvæmdum og hvers konar starfsemi á verndarsvæðinu sem getur haft áhrif á lífríki, jarðmyndanir og landslag svæðisins.

Lýsing verkefnis:

Sótt er um leyfi til að bora eftir neysluvatni við íbúðarhús á Þórólfsvoli í Mývatnssveit. Holan yrði staðsett 5 metra frá íbúðarhúsinu og verður um 10-20 metra djúp. Engin mannvirki verða reist í tengslum við borunina, einungis grunn borhola. Borinn verður fluttur að borstað eftir vegi og síðan eftir túni/garði við húsið. Gert er ráð fyrir að framkvæmdin taki 1 dag og fari fram í september 2021.

Umsagnir:

Í samræmi við 17. gr. reglugerðar nr. 665/2012 um verndun Mývatns og Laxár óskaði Umhverfisstofnun umsagnar Náttúrufræðistofnunar Íslands og Náttúrurannsóknarstöðvarinnar við Mývatn þann 13. ágúst 2021 vegna framkvæmdarinnar. Umsögn Náttúrufræðistofnunar Íslands barst þann 17. ágúst 2021. Í umsögn Náttúrufræðistofnunar kemur fram að stofnunin gerir ekki athugasemdir við veitingu leyfisins. Umsögn Náttúrurannsóknarstöðvarinnar við Mývatn barst þann 16. ágúst 2021. Í umsögn Náttúrurannsóknarstöðvarinnar við Mývatn kemur fram að hún gerir ekki athugasemdir við framkvæmdina.

Áhrifamat:

Umhverfisstofnun metur það sem svo að borunin hafi ekki áhrif á verndargildi svæðisins til langtíma sé farið eftir skilyrðum leyfisins.

Skilyrði:

Umhverfisstofnun veitir Ragnhildi H. Sigurðardóttur fyrir sitt leyti leyfi fyrir borun neysluvatnsholu við Þórólfsvoll innan verndarsvæðisins við Mývatn og Laxá sbr. lýsingu hér að ofan í september 2021 að uppfylltum eftirfarandi skilyrðum:

- Hafa skal þetta bréf með í för á meðan verkefninu stendur og kynna fyrir starfsfólki þau skilyrði sem fylgja leyfinu, áður en undirbúningur og vinna hefst.
- Tilkynna skal til starfsmanns Umhverfisstofnunar á svæðinu hvenær undirbúningur fyrir verkefnið hefst og þegar því lýkur með að minnsta kosti sólarhrings fyrirvara.
- Umhverfisstofnun skal tilkynnt um öll frávik við áður útgefna verkefnalýsingu, og eins ef breyting verður á tímasetningu verkefnis eins fljótt og auðið er.
- Þar sem þörf er á að fara út fyrir vegi skal þess gætt að valda sem minnstu raski og fjarlægja öll ummerki um athafnir utan vega að verkefni loknu.
- Einungis skal aka bornum að og innan skilgreinds framkvæmdarsvæðis. Afmá skal öll hjólför utan vega að framkvæmdum loknum.
- Forðast skal óþarfa rask og stærð framkvæmdasvæðis skal haldið í lágmarki.
- Vandað verði við frágang eftir að verki lýkur.
- Ef upp koma álitamál um framkvæmdir sem tengjast verkefninu og frágang svæðisins skal hafa samband við Umhverfisstofnun í síma 591-2000.
- Gæta skal að mengunarvörnum borsins og þess gætt að mengandi vökvi berist ekki í jarðveg/vatn.
- Þess skal gætt við akstur utan vega að hann fari fram á tímum þar sem hann veldur sem minnstu raski á jarðvegi og gróðri.
- Óheimilt er að raska votlendi vegna framkvæmdarinnar.
- Óheimilt er að trufla dýralíf.

Ef framkvæmdaraðili veldur náttúruspjöllum með framkvæmd í skilningi 87. gr. laga nr. 60/2013 um náttúruvernd getur Umhverfisstofnun t.d. lagt fyrir framkvæmdaraðila að afmá jarðrask og lagfæra gróðurskemmdir eða stöðvað framkvæmdir sbr. nánar XV. kafla laganna.

Ef umhverfisaðstæður á svæðinu breytast getur Umhverfisstofnun skv. 2. mgr. 89. gr. laga nr. 60/2013 um náttúruvernd breytt skilyrðum leyfis, bætt inn nýjum skilyrðum eða afturkallað leyfið til að koma í veg fyrir verulegt, ófyrirséð tjón á náttúru Íslands.

Leyfi sveitarfélags gæti þurft fyrir verkefninu.

Sé skilyrðum leyfis ekki fullnægt getur Umhverfisstofnun afturkallað leyfið skv. 1. mgr. 89. gr. laga nr. 60/2013 um náttúruvernd.

Eftirlit:

Umhverfisstofnun mun hafa eftirlit með framkvæmdum og frágangi á svæðinu. Eftirlitið verður framkvæmt af eftirlitsmanni frá Umhverfisstofnun.

Virðingarfyllt

Inga Dóra Hrólfsdóttir
sviðsstjóri

Arna Hjörleifsdóttir
sérfræðingur